

Մեր մայրերը

հեղինակ՝ Հակոբ Մնձուրի

Մենք մեր մայրերուն «մայր» կամ «մայրիկ» չէինք ըսեր: Սորվեցուցած չէին, չէինք գիտեր: «Հարսիկ» կըսեինք: Մեր հարսիկներն էին անոնք: Մեր տեղաբարբառին մեջ հարսիկը՝ պզտիկ հարս ըսել չէր, ինչպես՝ հայրիկը, մայրիկը՝ պզտիկ հայր, պզտիկ մայր ըսել չեն:

Մենք խոսիլը մեր մամերեն կսորվեինք: Անոնք մեր մայրերուն «հարս» կկանչեին, մեզի ալ՝ «հարսիկդ է», կվարժեցնեին: «Հարսիկդ եկավ, հարսիկդ գնաց» կըսեին: Կմեծնայինք, տասը, տասնհինգ տարեկան կըլլայինք խելքերնիս կհասներ, գիտեինք, թե անոնք մեր մայրերն են. բերաննիս հեղ մը վարժված էին, նորեն՝ հարսիկ կկանչեինք: Մամա ալ չէինք ըսեր: Մաման ի՞նչ էր: Մամա՝ մենք պառավներուն կըսեինք: Եթե մեր մայրերնուն «մայրիկ, մայր» կանչեինք, կզլզլային խնդալեն, չլսված բան մը լսած ըլալուն համար:

Մեր մամերը մեզ կմեծցնեին: Մեր մայրերուն պարտավորությունը՝ մինչև մեզ կաթե կտրելը ծծցնելն էր: Կմոտենային, կսպասեին, որ ծծեինք, ու իրենց ծիծերը կքաշեին մեր բերաններեն: Վայրկյան մը իսկ չէին կենար, կհեռանային, կըսես ոչ թե իրենց, այլ անծանոթի մը երախսաներն էինք: Երբ հետզհետե սկսեինք ճանչնալ զիրենք, թովոյանք, իրենց գիրկը երկննալ ուզեինք, անտարբեր կմնային: Կամչնային մեզ սիրելու, փայփայելու: Տանը մեջ կեսուրներու ու ուրիշներու ներկայությամբ մեզ չէին գրկեր, մեզ չէին առնիր ու նստեր: Կքննադատվեին, կայպանվեին. «Տղան գիրկը առեր ու նստեր է» պիտի ըսեին: Առտուն կանուխ կելլեին, մինչև իրիկուն ոտքի վրա կըլլային: Դիցուք թե՛ տունը կամ դուրսը ընելիք մը չէր մնացած, ամանները լվացեր, աղբյուրեն ջուր բերեր, բզուկները լեփլեցուն էին, ու տնեցիները մեղքնային, «նստե, հարս» ըսեին, ան պետք էր մերժեր, չնստեր, նույնքան իր արժանիքները կավելնային, ամենքեն կգովվեր, իսկ երբ շատ ստիպեին, մեկուսի կնստեր, ծնկածալ ու հանցավորի մը պես:

Մեր մայրերուն տարիքը նկատի չէին առնվեր: Քսան տարեկան ըլլային, թե քառասուն՝ հարս էին նորեն, ինչքան ատեն իրենց կեսուրները իրենց գլխին վերնն էին: Մեզ կարգելեն, իրենք ալ հարս մը առնելեն, կեսուր ըլլալեն հետո՝ հարս ըլլալէ կդադրեին:

Մեր ամենը մեր մամերը կրնեին: Երբ արթննայինք՝ մեր օրոցքեն կհանեին, կհագվեցնեին, մեր փորը կկշտացնեին՝ եթե կաթե կտրած էինք, իսկ եթե կաթնկեր էինք՝ մեր մայրերը կկանչեին, որ գային ու մեզ ծծցնեին: Օրոցքը՝ բարակ ու մաղված ավազի վրա մեզ կպառկեցնեին, շոր մը փռելով մեր տակը: Չմեռը ավազը կտաքցնեին ու կբարեխառնեին, ամառը առանց տաքցնելու կպառկեցնեին, վրաքաշիկով մը մեզ կապելով, որ մեջեն չիյնայինք, ու երեսձածուկով մը մեր աչքերը գոցելով, որ լույսը չտեսնեինք: Եթե ավազը թրջած էինք, թացը կնետեին ու չորը կփռեին, ու շորերը մեր մայրերուն կուտային, որ աղբյուրը տանեին ու շոր լվալիք գուռերուն մեջ մաքրեին: Մեր մամերը մեզ կլոզցնեին, կսանտրեին, մեզ կկայնեցնեին ու մեր վրա էնթարի, կրծիկ, շապիկ, սալթա կձևեին ու կկարեին ու մեր պատռածները կկարկտեին:

Մեր մայրերը աստոնցմով չէին զբաղեր: Մենք երախային՝ «պլիկ» կըսեինք: Անոնք պլիկ բերելու, այսինքն մեզ ծնելու, երկրորդ ակ՝ տունը, թե դուրսը՝ ուժեղ բազուկներով բան բանող մը ունենալու համար, մեր հայրերուն կառնեին: Բայց երջանիկ չէին ըլլար մեր հայրերը, ոչ ակ, մանավանդ, մեր մայրերը: Ամուսնութենէն տարի մը ետքը մեր հայրերը կձգեին մեր մայրերը, պանդխտելու կելլեին: Մենե շատերը դեռ աշխարհ եկած չէինք ըլլար կամ մեկերկու ամսվան հազիվ կըլլայինք: Եվ այս պանդխտությունը կշարունակվեր իրենց կյանքի տևողությանը: Կուգային 45 տարին անգամ մը, տարի մը կկենային, նորեն կերթային: Քսանեն՝ վաթսուն, քառասուն տարվան մեջ ընդամենը հինգ կամ տասը տարի մեր հայրերը գյուղը կըլլային, երեսունհինգ, քառասուն տարի այրիի կյանք մը կապրեին մեր մայրերը:

Ինչո՞ւ կպանդխտեին: Որովհետև՝ դրամ չկար գյուղը: Ամենեն ունևորները ճակատի և շիվի զարդոսկիներ մը ունեին՝ կիներուն համար: Իմ գավառս, ինչպես Եփրատի ենթակա մյուսները՝ Քեմախը, Չմշկածազը, Ակը, Արաբկիրը կամ՝ Տիվրիկը, այրերը պանդխտության դրկող գավառներէն էր: Մեր բերքերը ո՞վ կառնէր: Իմ տունս, օրինակ, մեզի բավելէն ավելի ցորեն կհանեինք: Շատ ընկույզ ունեինք: Ամպար մը ընկույզ, կարասներով չոր թութ, բուպ, օղի, գինի, վաթսուն կթոց կողով խաղող կունենայինք, որո՞ւ պիտի ծախեինք: Չորս տեղ այգի ունեինք, պահապանի դրամ երկերկու դուրուշ այգի գլուխ ու մեկմեկ կոտ ակ՝ այլուր: Այլուրը կուտայինք, ութը դրուշը՝ Պոլիսէն դրամ պիտի գար, որ տայինք:

Մեր ամեն երգերը պանդխտութենէ կառնեին իրենց թեմաները: Մեր օրորներէն շատ քիչը իրավէն օրոր էին: Շատը, շատշատը, անհատումը՝ պանդուխտին ուղղված, բացական կանչելու համար շինված էին: Մեր մայրերը պանդուխտի երգեր կանչելով մեզ կքնացնեին: Մենք պատրվակներ էինք՝ իրենց կարոտները, հուզումները պարպելու համար:

Քներ եմ, խոշ եմ եղեր,
Սիրուդ՝ սերխոշ եմ եղեր,

Հերու ի՛նչ աղեկ էի,
Աս տարի գեշ եմ եղեր:

Կամ՝

Խաչին, լուսունկին նորուն՝
Յար, ես քու ճամբադ կնայիմ,
Յար, ես՝ տղա, դուն տղա,
Մեր սիրուն չաղերն են հիմա:

Շատ ալ թուրքերեններեն կային, բայց չկարծեք, թե թուրքերը հորինած էին:
Հայերուն ստեղծագործություններն էին, հայու զգացումներով, գեղջուկ, նախնական:
Մենք, հայերս կկանչեինք.

Ղուրշումա կել քի՝ կյորեմ,
Էլին ուզաթ՝ կյուլ վերեմ,
Արամըզատ դարլը տադ՝
Պեն սենի նա՞ սըլ կյորեմ[1]:

Կամ՝

Ինտիմ՝ սուտան իչմեյե,
Օրախ ալտըմ պիչմեյե,
Տետիլեր՝ աղան կելտի,
Ղանատ ալտըմ ուչմայա[2]:

Երրորդ մը՝

Տութ աղաճր պոյումճա,
Տութ, յեմետիմ՝ տոյումճա,
Աղամ, ադզըմ դուրույա,
«Տար» տեմետիմ՝ տոյումճա[3]:

Աղան պարսկերեն է: Ամենամեծ տիտղոս մը: Շահին փոխանորդներուն կըսեն:
Մի նայիք՝ հոս աննշաններու կըսենք:

Մեր մայրերը ի՛նչ ներսեն, ի՛նչ խորունկեն, ի՛նչ տարվելով, ի՛նչ
քնարերգությունով կկանչեին: Զարմանային հոն է, որ մենք՝ երախաներս ալ
կուզեինք, մտիկ կընեինք, ընդհատելու ըլլային՝ կպոռայինք, որ կանչեին:

Դուք աշխարհին վրա ասանկ օրորներ լա՞ծ եք, կըլլա՞ն: Մեր
պանդխտությունը ձեզի պատմելուս՝ ասոնց նմանները ըսած էի:

Երեկոներն էին օրորներու պահը: Սևքարի լեռան կատարին առջև աստղը
ելած չէր ըլլար: Երախաները պիտի քնացնեին, որպեսզի հավաքվեին, ճաշի նստեին:

Բոլոր տուններեն, ամեն փողոցներեն կրարձրանային այս օրորները: Իմ գավառիս գյուղերը համերգ կսարքեին ամեն երեկո, մենք երախաներս համերգով կքնանայինք: Դուք գիտե՞ք, լսա՞՞ծ եք՝ Սըհակ թոչունը, որ ատենոք աղջիկ եղեր է, իր աղբարիկը՝ Սըհակը կորսնցուցեր է, թոչուն եղեր է, հիմա ամեն գիշեր կալերուն, երդիքներուն վրայեն թռելով կերթակուգա՝ Սըհակը կփնտռե: Մեր մայրերն ալ ամեն երեկո իրենց յարը, իրենց աղան կկանչեին:

Ամառ որ ըլլար՝ մեր մայրերը մեզ կշալակեին, Կարմիր հողերուն ու Խառիճակի այգիները կտանեին: Թթենիե թթենի մը կամ ծիրանիի մը կախօրան մը կհարմարցնեին, կպառկեցնեին մեզ մեջը: Օրելու պետք չկար, ճամբան գալեն հոգնած ըլլալով՝ իսկույն աչքերնիս կգոցվեին: Կուրախանային, որովհետև իրենք շատ գործեր ունեին ընելիք: Գետին ջուրը պղպեղներուն, լուիկներուն ածուները պիտի դարձնեին, այգետան ետևը ավազներուն վրա փոված թուփերը, ծիրանները չորցեր էին, իրիկունը տուն տանելու համար հապիկային աչքերը պիտի լեցնեին, վարունգնոցեն վարունգները պիտի փրցնեին, ու ժողվելով գլուխ չելլելիք գործը՝ ծառերուն տակի թուփերը պիտի ժողվեին: Հագարհագարներով թափեր էին բոլոր թթենիներուն տակը, առուին ագուդաներուն վրա, քովնտի ածուներուն մեջը: Մինակ նայեիր վրան՝ աչքերդ կառնեին: Ասոնք մեկիկմեկիկ ժողվել կուզեր:

Բայց գետին դիմացի ափեն պռռալու ձայնե մը, այգիե այգի անցնողներու բարձր խոսակցութենե մը, մոտակա մեղվընոցե մը պարս ելլող մեղուներու երաժշտութենե մը, թուփի մը՝ «փը՛թ...», մեր երեսձածուկին վրա իյնալե մը՝ մեկեն կարթննայինք: Գլուխնիս շարժելով, մեր երեսձածուկը կձգեինք, քիչ մը կնայեինք թուփերուն, քիչ մը ականջ կուտայինք ժիժիներուն ժի՛ժի՛ժի՛ժի՛ ... կանչելուն, կպռռայինք, որ գային, մեզ հանեին օրոցքեն: Մեր մայրերը կվազեին:

— Ծո՛, ինչո՞ւ արթնցար, ծո՛, քչիկ մըն ալ քնանայիր՝ ի՞նչ կըլլար: Ինչե՞ն արթընցար: Մեղուներու ձայնե՞ն, խոշորխոշոր խոսելով անցան քովեդ՝ անոնցմե՞, կախօրանիդ վրա թուփիկ ինկեր է՝ թուփիկներե՞ն:

— Ա՛խ, հարսիկդ ի՞նչ ընե քեզ... ադ սևուկսևուկ, վըլիվըլի նայող չամիչ աչուկներդ սիրեմ... կեռասի պես կարմրուկ ադ բերանիկդ, գատկվան հավկիթի պես կարմրուկ այդ երեսիկներդ սիրեմ... Ա՛խ, ինչո՞ւ արթընցար՝ կըսեմ:

— Ը՛հ... կընեինք:

— Ելլե՞ս... ծո հանեմ քեզ՝ ի՞նչ ընեմ... պլիկ ես... շատ պըտըլիկ ես, վարդավառին՝ յոթը ամսվան պիտի ըլլաս... չես կրնար մինակդ նստիլ... Ձեռքստքս կապեցիր... խենթ պիտի ըլլամ ես... տահա թուփիկ մը չէ ժողվեր հարսիկդ... հինգ ծառին թուփերը ե՛րբ և ինտո՞ր պիտի ժողվեմ, արևը պիտի փռեմ, որ չորնան, վաղը նորե՞ն պիտի գանք... ծո մամդ ի՞նչ պիտի ըսե. ասոր, անոր հետ խոսքի բռնվեցար, գործդ տեղը մնաց՝ պիտի ըսե...

Խոստին դարը կտանեին մեզ, քուրդ Կախմըխիի ետևի արոս արտերը: Արոսներուն խոտերը պիտի քաղեին: Ծառ չկար: Չողանի մը շուքը որչա՞փ կըլլա. գետինը, հողերուն վրա մեզ կպատկեցնեին, կքնացնեին, ու մանգաղը ձեռքերնին, մեր մայրերը, թե կքաղեին, ու թե՛ արոսին մեջ կառաջանային: Կախմըխցոնց ձորերը կիջնային, ուր առատ խոտ կըլլար: Հեռուեն եկող ձիի մը խրխնջունեն, չողանի մը թուփին վրա թառող թռչունի մը ճվճվոցեն կարթնայինք: Ձեռքերնիս կապված էին, գլուխնիս երեքցնելով՝ կհաջողեինք երեսնիս բանալու, մեկ ձայն կուլայինք: Մեկ կուլայինք, երկու կուլայինք, երեք կուլայինք, մեր մայրերը չէին գար: Ո՞ւր էին: Լացերնիս ավելի կսաստկացնեինք: Մեր լացերեն՝ քրդու կնիկները կուգային, ձեռքերնին վրանիս կղնեին, օրելու պես՝ փը 2-փը 2 կըսեին: Մեր հարսիկներուն չնամանող կնիկները տեսնելով՝ ալ ավելի կբարձրացնեինք մեր լացերը: Կերթային, կկանչեին:

— Դը՛գ, չոճուխըն աղլըյոր, դո՛2...[4]:

Մեր մայրերը կվազեին:

— Չորնա ու քոռնա հարսիկդ, ինչո՞ւ կուլաս, գիտցար թե՛ հոս չե՞մ... ձորը աղվորիկ հոտոցիկեր տեսա, դեղնուկդեղնուկ, անոնք քաղեմ ըսի... Չորնամ, ալ մի՛ լար, ալ մի՛ լար, ես եկա, նայե՛:

Կփայփայեին մեզ:

— Աչքերդ կոկանկոկան եղեր են, ալ մի լար, հա՛, նայե, ես քովիկդ եմ, տեղ չեմ երթար, ալ ձորը չեմ երթար... սրտիկդ վերվեր մի՛ ըներ: Ետքեն քչիկ մըն ալ կքաղեմ, բեռներս կլմնան, իշուն կբեռնանք, մեկտեղ տուն կերթանք:

Արտոցը արտերը քաղելու կտանեին մեզ: Ամիս մը արտ կքաղեին, արտերը կպատկեինք գիշերները, տուն չէինք գար: Շաբաթ իրիկունները միայն կուգայինք, կիրակի իրիկունները նորեն արտերը քաղելու կերթայինք: Երեք ձողերե եռոտանիով մը տաղան մը կշինեին, մեջը կախօրան մը կկապեին, արտե արտ կտանեին մեզ, կպատկեցնեին: Արտքաղը, երեք տուն միանալով, 2530 հոգիի բազմությունով մը կընեին: Մեր մայրերը միայն կծծցնեին մեզ, անոնք մեզմով չէին զբաղեր:

Ասոնք մեր մայրերուն պատմություններն են: Ինչեր որ քաշեցին անոնք՝ սուրբերը չքաշեցին. Հոփսիմենները, Գայանենները ավելի չչարչարվեցան՝ սուրբ ըլլալու համար:

ԾԱՆՈԹԱԳՐՈՒԹՅՈՒՆՆԵՐ

1. Առաջս եկ, որ տեսնեմ
Ձեռքդ երկարիր՝ վարդ տամ,

Մեր միջև ձյունոտ լեռ,
Ես քեզ ինչպե՞ս կտեսնեմ:

2. Իջա՛ ջրից խմելու,
Մանգաղ առա՛ հնձելու,
Ասացին՝ աղաղ եկավ,
Թներ առա՛ թռչելու:

3. Պահիր ծառը հասակիս համար,
Պահիր, չեմ կերել մինչև հագենալս
Աղաս, բերանս չորանա,
«Յար» չեմ ասել մինչև հագենալս:

4. Աղջի, երեխադ լալիս է, վազիր: